

Date – 03/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Union Textiles Minister Pu Giriraj Singh leh Chief Minister Pu Lalduhoma te chu vawiin khan Lengpui tumhmunah an inkawm a, Mizorama sericulture tihhmasawn dan tur an sawi dun.
2. MJA President Pu Vanlalrema Vantawl chuan vawiin World Press Freedom Day chu khawvel pum huapa chanchinbumite venhim na'na ni hman thin a ni a ti.
3. Zirtawpni a Mizoram ramri dep lawka awm Khawpuichhip khua Myanmar sipai indo thlawhna-in a beihna a mi 7 an thih avangin raltlan an lo luh belh.
4. State 4 leh Union Territory 1 assembly inthlana vote tlate, naktuka chhiar turin ruahmanna peihfel a ni.

<><><>

UNION MINISTER

Union Textiles Minister Pu Giriraj Singh leh Chief Minister Pu Lalduhoma te chu vawiin khan Lengpui tumhmunah an inkawm a, Mizorama sericulture tihhmasawn dan tur an sawi dun.

Pu Giriraj Singh-a'n social media kaltlanga a sawi danin Pu Lalduhoma nen hian Mizorama sericulture tihhmasawn dan tur sawi dunin hma thar lak dan turte an sawi dun a. He tah hian Secriculture Secretary pawh a tel a, Silk pangang atanga lak chhuah la zai tangkai zawka hman chungchangte, Mizorama puantah lam tihhmasawn bakah puantahtute leh silk pangang hmanga thil siamchhuaktute dinhmun chawikan dantur chungchangte an sawi dun a ni. Union Minister hian vawiin chawhnu her khan Lengpui tumhmun a lo thleng a. Chief Minister nena an inkawm hnu hian Lok Bhavan a thleng a. He tah hian Sericulture, Cooperation, Agriculture leh Handloom & Handicraft lam hotute nen an inkawmkhawm a. He mi hnu hian Lapar Seri Boutique, Kulikawn leh Zozia Silk Emporium, Tlangnuam tlawhin mahni kutkawiha eizawngte a kawm ang a, Cooperative Federation-a Chairperson leh member te bakah, BJP hruaitu leh Party Worker-te nena inkawm bawk tura ruahman a ni.

Chief Minister hi Union Minister nena an inhmuh hnu hian Delhi panin a chhuk thla nghal a ni.

<><><>

SPORTS MINISTER

Sports Minister Pu Lalngthinglova Hmar chuan FIFA Congress-ah football hmalam hun atana thil pawimawh tak tak rel, social media ah a tarlang.

Sports Minister hi Vancouver, Canada-a khawvela football inkhawmpui lian, FIFA Congress Vawi 76-na-ah Zirtawpni khan telin All India Football Federation aiawhin a palai a. Sports Minister chuan FIFA Congress-ah hian football kaihnawih thil hrang hrangah ni thum chhung hun an hman thu leh khawvel ram 210 atangin palai an kalkhawm thu a sawi a. He inkhawmpui lianah hian FIFA legends an tih, football thiam hranghlu tam tak an fuan khawm thu a sawi bawk a ni.

Sports Minister chuan FIFA Congress neih hma hian Asian Football Confederation Congress Vawi 36-na Vancouver, Canada-ah vek hman a nih thu a sawi a. Hetah pawh hian All India Football Federation aiawh thoin a palai tih sawiin football kum kaltaa Asian Football Confederation hmalakna an thirho thu leh season lo awm tura thil pawimawhte an rel thu a tarlang a ni.

<><><>

WORLD PRESS FREEDOM DAY

Mizoram Journalist Association (MJA) President Pu Vanlalrema Vantawl chuan vawiin World Press Freedom Day chu khawvel pum huapa chanchinbumi venhim na'na ni hman thin a nih thu a sawi.

Akashvani News in a kawmnaah he thu hi sawiin MJA President chuan vawiin World Press Freedom Day chu media zalenna humhimna leh thutak zawna kawnga chanchinbumite nunna chan te hriatrengna atana buatsaih thin a nih thu a sawi a. Chanchinbumite zalenna enfiahtu Reporters without borders sawi danin kum 2026 World Press Freedom Index-ah khawfel pum huapin chanchinbu zalenna chu kum 25 chhunga a hniam ber lai a ni a ti a. Ram 180 atangin a zat ve aia tam chu dinhmun harsa takah an din thu a sawi a ni.

Pu Vanlalrema Vantawl chuan kumin World Press Freedom Day thupuih "Shaping a Future of Peace: Promoting Press Freedom", remna leh muanna, hmalam hun siamtu tih hman a nih thu sawiin he thupui hian buaina chinfel kawngah leh democracy tihngheh kawngah te, leh thudik thehdarhna kawngah chanchinbumite pawimawhna a tarlang tih a sawi a ni.

<><><>

SRDC

Sialkal Range Development Council chu khaw paruk chauh huam lovin khaw 15 huam tura din tum a ni.

He mi chungchang hi GAD changtu Chief Minister Pu Lalduhoma'n tun hnai khan sawiin khaw paruk chauh huam tura ruahmanna siam chhoh a nih lai-in Paite hnam bil pual ni lovin he development council a tel duh khaw dangte nen pawt khawmin hnam bil ni lo development council din tum a ni a ti. He mi chungchang hi Assembly Select Committee chuan tun hnai khan a ngaihtuah tawh a, a buaipuitu lam pawhin an remnti tawh ni a hriat a ni. Sialkal Range Development Council dinna atan hian Sialkal Range Development Council Bill, 2026 chu Pu Lalduhoma hian kumin February ni 23 khan Assembly-ah a lo pulut tawh a. Sawiho a nih hnu-ah dodaltu tlawmngai pawlte an awm avangin en that leh turin Select Committee kuta dah turin thutlukna siam a ni a. Hnam bik pual ni lovin he lai biala cheng eng hnam pawh hma an sawn theihna turin ruahmanna kalpui a ni dawn a ni.

Chief Minister chuan a tira tel ve duh lo khaw engemawzatin Sinlung Hills Council huam chhunga tel ve an duh tawh thu a tarlang bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

REFUGEES

Zirtawpni chawhnu lama Mizoram ramri dep lawka awm Khawpuichhip khua chu Myanmar sipai indo thlawhna-in a bei a, naupang paruk leh puitling pakhat an thih avangin raltlan an lo luh belh.

Champhai district Police hotute hnen atanga Akashvani News thu dawn danin raltlan hi Zokhawthar khua-ah nimin thleng khan mi 160 an lo thleng thla a. Lainate leh thiante bel an awm lai-in belh tur nei lote chu Hall-ah leh sorkar building-ah te a remchan danin dah an ni . Champhai district thuneitute leh khawtlangin a tul angin an lo tuamhlawm a ni. Raltlante hi Zokhawthar bakah Vaphai lamah te an lut bawk na a, engzat chiah nge an nih a la hriat theih loh a, Vaphai khaw per Saikhumphai a luh tum engemawzat chu Assam Rifles te'n Tiau lui kan an remtih loh avangin Myanmar lama Tiau lui kamah an tangkhang mek ni a hriat a ni a. Khawpuichhip bomb a nih bakah hian Chin ralthuam keng pawlte thuneihna hnuai a hun rei tak awm tawh, Falam khawpui chu tun hnai lawkah Myanmar sipaite'n beihpui thlaka an laklet leh tak avangin Falam khawpui leh a chhehvel khua atangin raltlan engemawzat Mizoramah an rawn luh belh bawk a ni.

Khawpuichhip hi Mizoram leh Myanmar inrina Tiau lui atanga hnai te a awm a ni a. Ralthuam keng pawl pawh awm lohna a ni chungin Myanmar indo thlawhnate

hian Zirtawpni chawhnu dar 3 leh minute 20 vel khan an bei thutin, bomb 2 an thlak a, mi 7 an thih bakah in 10 chuang a chhia ani thite hi Pu Lalnunfela (29) leh a fate pathum – nausen thla 5 chauha upa Lalrinzuala, Lalhuapzauva (4) leh Malsawmmawia (5) te bakah Lalrinnunga (10), Lalhriatkima (5) leh Jedidia Laldusaka (3) te an ni a. Hliam engemawzat zingah Pu Lalnunfela nupui pawh a tel ve nia sawi ani.

Myanmar sipaite'n boruak leh khawmuala beihpui thlaka Falam khawpui an lak hnu Khawpuichhip an bomb hma pawh hian khaw engemawzat indo thlawhna hmangin an lo bei tawh a. He tiang hi an dinhmun a nih avangin Falam khawpui chhehvel atang hian raltlan engemawzat Champhai district a Myanmar dep khaw thenkhatah an lo luh belh tawh bawk a ni.

<><><>

DRUG HAUL

Assam Rifles leh Champhai district Zokhawthar Police Station Police te tangrual chuan Zokhawthar khua-ah methamphetamine kg 12 leh gram 93 an man.

Methamphetamine man hmasak hi Zirtawpni kha a ni a. Zokhawthar leh Myanmar inkalpawhna pakhat Balukai-ah Methamphetamine kg 3 leh gram 468 an man a, mihring man erawh an nei lo ani. Nimin khan Zokhawthar khua leh Melbuk inkarah methamphetamine kg 9 leh gram 462 an man leh a. Myanmar atanga ruihhlo tawlhurutu a puh India mi 2 leh Myanmar mi pakhat an man. Ruihhlo leh an mi mante hi Zokhawthar Police Station kuta hlan a ni a. Zokhawthar Police-te hian chhui zui-in dan hmangin hma an la chhunzawm mek a ni. Hemi ni vek hian Assam Rifles leh Champhai district Excise & Narcotics department hnathawk tangho chuan Aizawl Ramthar vengah heroin gram 397 an man bawk a. Manipur a Lamka khawpui a cheng, heroin tawlhurutu ni a hriat mi 4 chu he ruihhlo man kaihnawihah hian man an ni a, Ruihhlo leh a neitu a puhte hi Excise & narcotics department thuneitute kutah hlan an ni.

<><><>

COUNTING

Tun hnaia assembly inthlan vote thlak neihna West Bengal, Keralam, Tamil Nadu, Assam leh Puducherry-a vote tlate, naktuk zing atanga chhiar tan turin ruahmanna peihfel a ni tawh.

Assembly seat 126 awmna, Assam-ah chuan venhimna khauh tak hnuaiah vote hi district 35-a counting centre 40-ah chhiar a ni dawn a, tun tum inthlanah hian candidate 722 awmin an zinga 59 chu hmeichhia an ni a, April ni 9-ah khan vote thlakin vote zaa 85.96 a tla a ni.

West Bengal-ah chuan counting centre 77-ah vote chhiar a ni ang a, Tamil Nadu-ah chuan vote chhiar turin mi 10,545 ruat an ni a, Puducherry leh Keralam-ah te pawh venhimna khauh tak hnuaiah vote chhiar turin ruahmanna peihfel a ni.

Hetih lai hian Election Commission chuan West Bengal South 24 Parganas Dist-a Falta Assembly bialah vote thlak tha turin thupek a chhuah a, he bial huamchhunga polling station 285-ah tun thla ni 21-ah vote thlak that a ni ang a, May ni 24-ah vote chhiar a ni ang. Election Commission thuchhuah sawi danin, April ni 29-a vote thlak tum khan he bialah hian vote thlakna khawl tih chingpente, midang

hminga vote thlakte an awm bakah thil fello dang tam tak a awm avangin vote thlak
tha turin ruahmanna siam a ni.

<><><>